

Headlines

- 1 प्रधानमंत्री नरेंद्र मोदी अज्ज संझा जार्जटाउन च गुयाना दे राष्ट्रपति डॉ. मुहम्मद इरफान अली कन्नै गल्लबात करडन।
- 2 रक्षा मंत्री राजनाथ सिंह होर आसियान रक्षा मंत्रियों दी बैठक प्लस च हिस्सा लैने लेई लोआस दे त्रै दिनें दे दौरे पर रवाना होई गे'न।
- 3 कठुआ दे डिप्टी कमिशनर होरें करसानें गी आखेआ जे ओहू समग्र राई-बाई कार्यक्रम तैहत मुट्टे अनाज दी रड ते खरीद लेई राई-बाई मैहकमे आसेआ दित्ती जा-रदी सब्सिडी दा फायदा लैन।
- 4 जम्मू-कश्मीर केंद्र शासित प्रदेश दी सरकार उपभोक्ताएं दे छत्तें पर सोलर पैनल लाने लेई कम्म करा'रदी ऐ।

<><><><><><>

PM-Guyana

प्रधानमंत्री नरेंद्र मोदी होर जॉर्ज टाउन च गुयाना दे राष्ट्रपति डॉ. मोहम्मद इरफान अली हुंदे कन्नै गल्लबात करडन। गल्लबात मगरा केई समझौतें पर दस्तखत होने दी मेद ऐ। प्रधानमंत्री होर त्रै दिन दे दौरे पर अज्ज बडुलै गुयाना पुज्जे। इक टकोहदी गैंड पुट्टे होई राष्ट्रपति होरें आपूं इक दर्जन थ्वां मते कैबिनेट मंत्रिण कन्नै हवाई अड्डे पर उंदा सौआगत कीता। प्रधानमंत्री होर दुए गुयाना दी संसद गी संबोधित करडन। उंदा भारतीय मूल दे लोकें गी संबोधित करने दा बी कार्यक्रम ऐ। हाल च गै भारत ते गुयाना बश्कार उच्च स्तरीय संपर्क च तेजी आई ऐ। राष्ट्रपति इरफान अली पिछले बरे जनवरी च प्रवासी भारतीय दिवस दे मुख्ब परौहने हे। सेहत, राबता, अक्षय उर्जा ते पानी सरबन्धी क्षेत्र च भारत दी गुयाना कन्नै लम्मी अवधि आहली विकास भ्याली ऐ। दौरे दौरान गुयाना प्रधानमंत्री होरें गी the order of excellence सम्मान कन्नै सम्मानित करोग।

<><><><><><>

Rajnath-LAOS Visit

रक्षा मंत्री राजनाथ सिंह होर आसियान रक्षा मंत्रिण दी बैठक प्लस च हिस्सा लैने लेई लाओस दे त्रै दिन दे दौरे पर रवाना होई गए न। बैठक दौरान ओहू क्षेत्रीय ते अंतरराष्ट्री सुरक्षा मुद्दें पर मंच गी संबोधित करडन। ADMM आसियान च सर्वोच्च रक्षा परामर्श देने आहला ते सहयोगी तंत्र ऐ। ADMM Plus आसियान दे सदस्य मुख्बें च ब्रुनेई कंबोडिया, इंडोनेशिया, लाओस, मलेशिया, मयंमार, फिलीपीन्स, सिंगापुर, थाईलैंड, यितनाम ते भारत, अमरीका, चीन, रूस, जपान ते दक्खन कोरिया सने 8 संवाद हिस्सेदारें आस्तै इक मंच ऐ। ADMM Plus मंत्री आसियान ते प्लस मुख्बें बश्कार सहयोग गी मजबूत करने आस्तै सालाना बैठक करदे रेय न। सिंह हुंदा आस्ट्रेलिया, चीन, जपान, लाओस, मलेशिया, न्यूजीलैंड, फिलीपीन्स, दक्खण कोरिया ते अमरीका दे अपने समक्षें कन्नै दपक्खी बैठक लाने दी मेद ऐ। इनें बैठकें दा मकसद इनें मुख्बें कन्नै दपक्खी रक्षा सहयोग गी होर बढाना ऐ।

<><><><><><>

CM-H&P

मुख्यमंत्री उमर अब्दुल्ला होरें कल खात्तम तवज्जो मैहकमें गी आखेआ ऐ जे ओहू अंदरले ते बाहरले दौनें मैहकमें दी संपत्ति गी बेहतर बनाने पर खास ध्यान देन। उनें एहू गल्ल सिविल सचिवालय जम्मू च खातर तवज्जो मैहकमे दी समीक्षा बैठक दी अध्यक्षता करदे होई आक्खी। बैठक दौरान कमिशनर सैक्रेटरी रश्मि सिंह होरें मैहकमे दी संपत्तियें बारै तफसीली जानकारी दित्ती जिंदे च जम्मू-कश्मीर थमां बाहर स्थित संपत्तियां जियां दिल्ली, चंडीगढ़, अमृतसर ते मुम्बई दी संपत्तियें बारै तफसीली

जानकारी दित्ती। मुखमन्त्री होरें दिल्ली च चाणक्यपुरी, 5 पृथ्वी राज रोड ते राजा जी मार्ग सने प्रमुख संपत्तियें दे कम्मकाज ते स्थिति दी समीक्षा करदे होई इनें संपत्तियें दा पूरा-पूरा इस्तेमाल करने ते उंदी जरूरतै च बाद्दा करने लेई सुविधाएं गी बेहतर बनाने दी जरूरतै पर जोर भेरआ। मुखमन्त्री उमर होरें पैहलगाम, गुलमर्ग, श्रीनगर उधमपुर ते जम्मू च संपत्तियें उप्पर आधारित निर्देश दित्ते जेह्दे कन्नै एहू यकीनी बनाया जाई सकै जे इन्दा इस्तेमाल बेहतर ढंग्गै कन्नै कीता जाई सकै।

<><><><><><>

Heritage-Walk

खुराक, नागरिक आपूर्ति ते उपभोक्ता मामले, परिवहन ते युवा सेवाएं ते खेडू मंत्री सतीश शर्मा होरें कल कला केंद्र जम्मू च इक प्रदर्शनी दा उद्घाटन करने दे अलावा Heritage walk गी झंडी दस्सियै रवाना कीता। मंत्री होरें Heritage walk गी कला केंद्र जम्मू थमां अभिनव थियेटर लेई रवाना कीता। एह्दा आयोजन स्कूली शिक्षा मैहकमे, कला, संस्कृति ते भाशाएं सरबन्धी अकैडमी ते पुरातत्व ते अजैबघर मैहकमे दे सहयोग कन्नै कीता गेदा हा। इस कार्यक्रम च बड़ी बद्द गिनतरी च बक्ख-बक्ख स्कूलें दे विद्यार्थियें हिस्सा लैता। मंत्री होरें अभिलेख ग्रंथें दी प्रदर्शनी दा बी उद्घाटन कीता। इस मौके पर मंत्री होरें आखेआ जे विश्व Heritage walk सांस्कृतिक ते ऐतिहासिक विरासत गी बचाने ते बढावा देने लेई इक वैश्विक उत्सव ऐ। उनें इस गल्लै पर जोर भेरआ जे विश्व Heritage walk दा मुख मकसद युवा पीढ़ी गी अपनी विरासत गी बचाने लेई प्रेरित करना ऐ।

<><><><><><>

CS-RAS

मुख सचिव अटल डुल्लू होरें कल जिला विकास कमिशनरें कन्नै-कन्नै सब्बनं मैहकमें दे प्रशासनिक प्रधानें दी बैठक दी अध्यक्षता करदे होई आखेआ जे जम्मू-कश्मीर पुनर्वास सहायता योजना यानि (RAS) तैहत् जिन्ने बी आवेदन हासल होए न, उन्दा तौले शा तौले निपटारा कीता जा। इस योजना तैहत् हासल होए दे आवेदनें दी मौजूदा स्थिति दा जायजा लैदे होई सरबन्धत मैहकमें गी निर्देश दित्ते न जे हासल होई दी आवेदनें दी मैरिट लिस्ट बनान ते फ्ही नियुक्तियां करान। उनें आखेआ जे बरे 2022-23 ते 2024 लेई थ्हाए दे आवेदन ते इस दौरान जमा कीती गेदी खाली पदें गी तौलें शा तौले भरन। मुख सचिव होरें आम प्रशासनिक मैहकमे गी हुक्म दित्ता जे ओहू खाली पदें गी आम पूल दे तैहत् किट्टा करन ते उसी तौले शा तौले भरे जाने लेई सरबन्धत मैरिट लिस्टें गी तैयार करन। उनें डिप्टी कमिशनरें गी सलाह दित्ती जे ओहू अपने-अपने जिलें दे मामलें दी आपूं निगरानी करन तां जे तहसीलदार आसेआ जारी कीते जाने आहले प्रमाण पत्र घट्ट समें च उपलब्ध करोआए जाई सकन।

<><><><><><>

CS-JK Samadhan

मुख सचिव अटल डुल्लू होरें सारे मैहकमें दे प्रशासनिक सचिवें ते डिप्टी कमिशनरें कन्नै बैठक लाइए जे.के समाधान पोर्टल पर दायर जन शकैतें दे निपटारे दा जायजा लैता। एह्दा प्रबन्धन जन शकैतें सरबन्धी मैहकमें आसेआ कीता जन्दा ऐ। अटल डुल्लू होरें मैहकमें पर जोर पाया जे ओहू होर बेहतर ते कारगर तरीकाकार अपनान तां जे लोकें गी एह्दे बारै बेहतर जानकारी हासिल होई सकै। उनें जन शकैत मैहकमे गी हिदायत कीती जे ओहू आई.टी पेशेवरें दी टीम रक्खन तां जे नागरिकें गी कुसै चाल्ली दी परेशानी पेश नेई आवै। डुल्लू होरें मैहकमे ते जिले स्थाबै बकाया मामलें दा जायजा लैता। उनें मामलें दे निपटारे लेई समें सीमा तय करने लेई गलाया।

<><><><><><>

Millet-Kathua

कठुआ दे डिप्टी कमिशनर डॉ. राकेश मिन्हास होरें कठुआ दे पथवाल च मिलेट रेस्टोरेंट दा उद्घाटन कीता। एह्दा मकसद राई-बाई दे विकास लेई कम्म करना ऐ। एहू जत्र इक्क हिस्सा ऐ राई-बाई दे पूरे-पराते विकास सरबन्धी प्रोग्राम दा। एह्दे राएं रागी ते ज्वार जनेहू मुट्टे अनाज दी खपत च बाद्दा ते लोकें गी इन्दे बारै जानकार बनाना ऐ। इयै जनेहा मुट्टा अनाज स्थाडी सेहत लेई

बड़ा कारी दा हुंदा ऐ। डॉ. मिन्हास होरें इस जन्न लेई महिला आप सहायता समूहें गी मुबारकबाद दिती। स्हाड़े जिला संवाददाता प्रदीप शर्मा हुंदी रिपोर्ट मूजब कृष्णा मिलेट रेस्टोरेंट महिला आप सहायता समूह आसेआ चलाया जा'रदा हा। डिप्टी कमिशनर होरें आखेआ जे मुट्टा अनाज सेहत लेई फायदेमंद हुंदा ऐ ते एह करसानें लेई बी लाहकारी ऐ ते पर्यावरण दे अनुकूल ऐ। डिप्टी कमिशनर होरें करसान समुदाय गी आखेआ जे ओहू राई-बाई मैहकमे आसेआ मुट्टे अनाज दी रड लेई दिती जा रदी रौं रियायतें थवां फायदा लैन। करसान राईबाई दे पूरे-पराते विकास सरबन्धी प्रोग्राम तैहत् होर सहायता ते मदद बी लेई सकदे ना।

<><><><><><>

JKEDAMuft Bijli

पी.म.एम. सूर्य घर मुफ्त बिजली योजना तैहत् सब्सिडी सुविधाएं दा फायदा लैने लेई उपभोक्ताएं गी प्रेरित करदे होई जम्मू-कश्मीर उर्जा विकास एजेंसी उनेंगी छत्त पर सोलर पैनल लाने ते बिजली दे नते बिलें थमां छुटकारा पाने लेई कम्म करा'रदी ऐ। आकाशवाणी जम्मू दे संवाददाता दी जानकारी मूजब JAKEDA उर्जा दी उपलब्धता, उर्जा, सुरक्षा, सौर, कार्बन उत्सर्जन गी घट्ट करने बायोमास ते हाईड्रोजन सने हर चाल्ली दे अक्षय उर्जा दे व्यापक तौरा पर अपनाने ते एहदे उपयोग गी बढ़ावा देने परक म्म करा रदी ऐ। बिजली दी बंड सरबन्धी मैहकमे JPDCL नै घरेलू उपभोक्ताएं गी अपील कीती ऐ जे ओहू पी.एम. सेर्य घर मुफ्त बिजली योजना तैहत् अपने छत्तें पर सौर प्लांट लान तां जे बिजली दे मते बिलें थमां बचेआ जाई सकै ते इस स्कीम थमां फैयदा हासल कीता जाई सकै।

<><><><><><>

Rail Kashmir

केन्द्री रेल राज्यमंत्री रवनीत सिंह होरें आखेआ ऐ जे दिल्ली ते कश्मीर बश्कार रेल सेवा मेद ऐ जे अगले ब'रे जनवरी च शुरु होई जाह्ग। आकाशवाणी दे जम्मू संवाददाता दी रिपोर्ट मूजब, कटरा-रियासी रेल सैक्शन पर जारी कम्में दा जायजा लैने लेई मंत्री होर कल रियासी गेदे हे। ध्यानजोग ऐ जे रेलवे नै पैहले गै दुनिया दे सब्बनें शा उच्चे रेलवे पुल राहें कश्मीर थमां रियासी तगर दिआं कामयाब आजमाईशां करी लैती दिआं ना। इस हिस्से पर हून छड़ा तकरीबन 20 किलोमीटर दा गै ऐसा हिस्सा बाकी रेई गेदा ऐ जेहदा कम्म हून अखीरले चरण च ऐ ते मेद ऐ जे एहू कम्म बी औंदे दिसम्बर म्हीने सबूरे करी लैते जाडन। मंत्री होरें कल कम्में दा मुआयना करदे होई मेद जाह्ग कीती जे दिल्ली थमां कश्मीर तोहड़ी रेल सेवां अगले ब'रे जनवरी म्हीने दे पैहले हफ्ते शुरु होई जाडन। स्हाड़े जिला संवाददाता देवेंद्र ठाकुर कन्नै गल्लबात करदे होई केंद्री रेल राज्यमंत्री रवनीत सिंह होरें आखेआ।

<><><><><><>

Poonch-Day

भारतीय फौज नै पुंछ दिवस दा जश्न मनाने लेई पुंछ दे प्रीतम पवीलियन च इक सांस्कृतिक कार्यक्रम 'जश्न'ए'महफिल दा आयोजन कीता। इस कार्यक्रम च मकामी लोकें बड़ी बद्द गिनतरी च हिस्सा लैता। इस कार्यक्रम च काबुल बुखारी सने होरनें गायकें अपनी प्रस्तुतियां पेश कीतियां। एहू पैहलकदमी पुंछ च शांति, रमानदारी ते सांस्कृतिक गौरव गी बढ़ावा देने लेई फौज दी प्रतिबद्धता गी दर्शादी ऐ। जश्न-ए-महफिल जनेहू कार्यक्रम इस खेत्तर दी समृद्ध परम्पराएं गी मनाने च मती भूमिका नभांदे ना। स्हाड़े जिला संवाददाता कन्नै गल्ल करदे होई नगर परिषद दे साबका अध्यक्ष राजिंद्र सिंह होरें आखेआ।

<><><><><><>

GS-Vishavvidyalya

रेल मंत्री अश्विनी वैश्वणव होरें आखेआ ऐ जे गतिशक्ति विश्वविद्यालय प्रधानमंत्री नरेंद्र मोदी हुंदी सोच ते नजरिए मूजब मुल्ख ते दुनिया दे बेहतरीन विश्वविद्यालय दे तौर पर उभरने गी तैयार ऐ। कल नमीं दिल्ली च शीर्ष संस्था दी पैहली बैठक दी

अध्यक्षता करदे होई वैश्व होरें आखेआ जे एह विश्वविद्यालय उद्योग ते रोजगार केंद्रित पाठ्यक्रम उपलब्ध करोआग। इंदे च रेलवे, विमानन, राजमार्ग, जहाजरानी ते रक्षा क्षेत्र कन्नै सरबन्धित पाठ्यक्रम शामिल होडन। रेल मंत्री होरें आखेआ जे भारती रेलवे प्रबन्धन सेवा दे नमें नियुक्त अधिकारिणं गी गतिशक्ति विश्वविद्यालय आसेआ तय सिखलाई दिती जाग। इस सिखलाई च केंद्री सिखलाई संस्थानें ते उद्योगें थवां हासिल सैद्धांतिक ते होर दुए अनुभव शामिल होडन। एहदे मगरा गतिशक्ति विश्वविद्यालय थवां एम.बी.ए दी डिग्री थहोग।

<><><><><><>

Speaker-Assembly Complex

जम्मू-कश्मीर विधानसभा दे स्पीकर अब्दुल रहीम राथर होरें नमें विधानसभा परिसर जम्मू दे कम्मकाज दी प्रगति दा जायजा लैता। बैठक दौरान स्पीकर होरें कम्मै दी मौजूदा स्थिति ते होरनें सरबन्धी पैहलुएं दा जायजा लैता। उनें प्रोजैक्ट दी माली प्रगति दा बी निरीक्षण कीता। उनें प्रोजैक्ट दे सुचारू संचालन सरबन्धी बक्ख-बक्ख चीजें दा जायजा लैता। उनें मुतल्लका एजेंसिएं गी हिदायत कीती जे ओहू कम्मै दी रफ्तार गी बदान तां जे एहू मित्थे गेदे समें अंदर सबूरा होई सकै। मगरा स्पीकर होरें नमें विधानसभा परिसर दा दौरा लाया ते बक्ख-बक्ख सीगें दा जायजा लैता।

<><><><><><>